

## REZIME PODRŽANIH PROJEKATA

Javni poziv organizacijama civilnog društva (OCD) i neformalnim grupama građana (NGG) s područja Bosne i Hercegovine (BiH) da se prijave za partnersku saradnju i učešće u realizaciji promotivne kampanje i organizaciji događaja usmjerenih na povećanje vidljivosti filantropije u BiH u 2023 godine

### Fondacija „Muharem Berbić“ Kakanj

Fondacija Muharem Berbić je osnovana 2015. godine u Kaknju s ciljem pružanja direktne pomoći pojedincima i zajednici. Fondacija stipendira učenike i mlade. Ovim projektom žele organizovati aktivnosti kojima bi promovisali filantropiju u općini Kakanj kroz prizmu i djelo filantropa Muharema Berbića po kojem Fondacija nosi ime. U tu svrhu će organizovati izložbu koja će u javnom prostoru građanima Kaknja omogućiti uvid u dokumentovanje arhivske građe porodice Berbić, novinskih članaka i svih drugih popratnih materijala koji svjedoče o njegovom životu i djelu. Izložba će biti otvorena za sve građane u Klubu prijatelja Fondacije. U okviru projekta će biti realizovane i druge aktivnosti usmjerene na promociju filantropije: press konferencija, okrugli sto i diskusija sa članovima porodice Berbić; radionice na temu filantropije za djecu i koncert.

### Udruženje „Volonteri i prijatelji konjičke regije Konjic“ (VIPK)

Udruženje „Volonteri i prijatelji konjičke regije,“ je omladinsko udruženje koje okuplja članova različitog uzrasta i već 16 godina djeluje na području konjičke regije. Za svoje aktivnosti prepoznato i od Ambasade SAD-a u BiH kao šampioni volonterizma. S ciljem promocije filantropije i filantropskih napora u svojoj općini žele organizovati umjetnički performans „Šarena ulica filantropije“ i javni događaj „Gala večer filantropije u Konjicu“. Obje aktivnosti su promotivnog karaktera i za cilj imaju ujedinjenje i zajedničku promociju velikih i malih filantropskih priča iz konjičke regije, a sve kako bi filantropska davanja promovisali kao vrijednost koja se višestruko vraća.

### Neformalna grupa „Lokalna fondacija Bijeljina“

Neformalnu grupu građana koji su nosioci ovog projekta predstavlja grupa prijatelja filantropa sa područja Bijeljine koji djeluju s ciljem osnivanja prve lokalne fondacije u ovom gradu. Želja im je da probude i promovišu filantropiju na području Bijeljine, te da Lokalna fondacija postane temelj filantropskih aktivnosti i darivanja na tom području. U tu svrhu projekat "Festival Dani filantropije u Bijeljini" koji su predložili smatraju dobrom prilikom u svom cilju i nastojanju da ožive dobročinstvo u bijeljinskom kraju. Festival bi bio ispunjen događajima kojima se slavi filantropija, kultura darivanja i aktivizam. Kroz projekat će organizovati panel diskusiju kojoj će prethoditi istraživanje o filantropiji na ovom području, zatim kulturno veče sa filantropima i muzički koncert.

### Centar za edukaciju mladih Travnik

Centar za edukaciju mladih Travnik postoji više od 20 godina i djeluje na području Općine Travnik na stvaranju zdravog i sigurnog okruženja za razvoj mladih, ohrabrujući ih i podržavajući da ostvaruju svoj puni potencijal. U promociji filantropije u Bosni i Hercegovini Udruženje želi učestvovati kroz projekat "Zajedno za sretnije djetinjstvo" koji ima za cilj promociju dobročinstva, ali i uspostavljanje kvalitetnije saradnje sa lokalnim akterima i budućim donatorima. Kroz projekt organizacija želi organizovati večer filantropije gdje će



kroz pozorišni performans, video i druge umjetničke sadržaje ukazati lokalnim akterima - građanima, vlastima i poslovnom sektoru na važnost razvoja kulture darivanja. Poseban fokus udruženje će staviti na značaj i održivost programa "Stariji brat, starija sestra" kojeg godinama u udruženju provode, a koji na holistički način objedinjuje promociju volonterizma i filantropije te kao takav predstavlja najbolju promociju pozitivnih vrijednosti u široj društvenoj zajednici.

### **Neformalna grupa „Lokalna fondacija Kapetan“ Sarajevo**

Članovi Neformalne grupe „Lokalna fondacija Kapetan“ Sarajevo su se okupila sa idejom osnivanja prve lokalne fondacije u Sarajevu. Iako je još uvijek u procesu nastajanja i formalno pravno neregistrovana, ova grupa građana poduzela je niz filantropskih aktivnosti u svojoj zajednici. Naime, oni žele ujediniti građane Sarajeva oko koncepta lokalne fondacije te na taj način razviti osjećaj solidarnosti i pripadnosti svojoj zajednici i razviti kulturu darivanja među građanima zajednice. Kroz projekat pod nazivom "Otvorene biblioteke u Sarajevu - knjiga za sve" žele da se zahvale dosadašnjim lokalnim donatorima, ali i da prošire krug filantropa i pozicioniraju se u svojoj zajednici, kako bi u budućnosti ova fondacija mogla formalno djelovati i osnivati filantropske fondove. U skladu s tim kroz ovaj projekat žele organizovati manifestaciju u kojoj će pozvati građane da poklone knjige koje će činiti fond budućih otvorenih biblioteka u svim zajednicama Sarajeva. Manifestaciju će činiti niz aktivnosti: prezentacija rezultata i rada, Q&A sesije na temu filantropije, igra "Human Bingo" i koncert za sve učesnike. Cilj je navesti ljude da razmišljaju i pričaju o filantropiji.